

Musica

A SIGNORA

Scusate, ùn l'aghju micca fatta à posta.

Ùn ci saria mai entratu s'è tuttu era statu cum'è di solitu : a tighjata chì colla linda è vene da A Marina, franca E Terrazze è sbocca nant' à A Traversa di i Sgìò. Di solitu, a muraglia cù i pilastri buzzati, ùn ci hè mancu tempu à vede la, s'ellu ùn hè qualchì sguardo lampatu in furia in furia nantu. I zitelli l'anu, l'asgiu, ma ùn ci hè l'arte à vede nunda chì a muraglia hè alta troppu.

Dopu, pè a ghjente fatta, hè un'antra cosa. Ci sò quelle faccende di tutti i ghjorni chì vi impediscentu di francà e muraglie di a curiosità. Ma noi, puru zitelli, ùn ci l'emu fatta. À quandu era un bellu brocciu di trè libre da andà à piglià ; a marcante era à capu è a ropa pronta è lestra, impacchittata cù a so bella carta grisgia, tosta è sticchita. L'avianu falatu e Villese, frescu di a matina. Bastava à andà è fà marcà : pacaria ella. À quandu ci tucava à piglià più insù, per andà à empie a giarretta di zingu à a funtana di i Gesuiti : in cità, cù sti sulleoni, l'acqua hè sempre stata scarsa.

E' po dopu, ci hà da vulè à fà a coda pè un'asta di ghjaccia ; infine, un'asta... Mamma mi hà datu duiecentocinquanta franchi : dui biglittoni è unu più chjucu chì mi scrimizeghjanu ind'istacca, cù a palma di a manu bella appiccicata nantu. Mi ne hà da vene un quartu d'asta à u più. U marcante lampa u so piccu è mi scizzanu in faccia centu scaramizzulelli cutrati : ne face vene una sin' à u bancu duv'ellu hà postu dui sacchi di tela roza chì sguccieghjanu sin' à in terra. Rimori di i scarpi ind' u pattume.

Imbucingu u ghjacciu ind'è l'asciogna : un pezzu di lenzolu vechju è liveru - ma pulitu, ch'è vo ùn credite ! -, u giornale di l'altra settimana, u saccu umule umule à rombu d'esse frustu. Pare tuttu una pella bruna rivuccata d'un colpu nant' à u pezzu di ghjacciu. À l'ultimu vene l'asciogna, è a curdella bella stretta. Aghju modu à piglià tutte e precauzione ch'ella dice mamma, principia digià à strughje mi trà e mani è ne sentu a cutrura, è sgotta pianu pianu. A strascinella prestu avvampata nant' à u tighjatu chì mi riporta in i carrughji. Mi spicciu, ma saraghju sempre ghjuntu troppu tardi, è mi aghju da fà mughjà.

Hè una giarretta tutta di zingu. Grisgia è chì suda. Ristagnata più d'una volta à la lesta, cum'è medaglie duv'ellu si azzinga u sole nant' à u tavulinu, in sala. Si hè ficcatu trà l'albe : un ragiu fine ma seccu, è chì sbacca a tavula in dui. Nant' à a giarretta, di latu, ci hè un tufone à posta pè u ghjacciu : hè difesu di ficcà ci e dite ch'osinnò strughje troppu prestu. A giarretta di zingu ùn sorte da un stanzinu di bapu è di mamma, hè una spesa di lussu, ma i cugini, ci vole à tratta li bè, ùn hè vera ?

Ùn sò cum'hè ch'ò vi parlu di issu ghjacciu è di a giarretta di zingu. Era piuttosto per di chì a ferrata era sgrignata è chì hè quessa chì m'hà stupitu. Hè statu cume s'è qualchissia mi vulia fà entre. Aghju pigliatu è sò entratu.

Scusate, ùn l'aghju micca fatta à posta.

VUCATA ROSULAGHJA

Vucata rosulaghja
À l'orlu d'un fiume
Ballu veranile
Di surelle sanguine

Tomba marina d'un fiore coltu
Tremulu lunaghju è carezza celesta
Per tè rosula cara

Si morenu li to ochji
In issa corsa infinita
Per issa secreta ferita
Per issu secretu pientu
Per issu cantu spentu
Per ellu

VIAGHJU

O pueti !
Cosa circate ? Ella ?
Seguitate l'acella !
Hè luntanu quellu boscu,
Sò francati i mondi foschi :
Hè qui chì v'aspetta.
Muntagnate sin' à a serra,
Ci s'incontra l'aghja celesta,
Ci sò e cose più belle !
Ùn hè stata vana a Cruciatu.
Serà felice o puè, a to sorte :
Beatrice, fata innargentata
Cerca un vivu frà li morti
Trovu ai a to prumessa.
È in issu mondu di lume
Sparghji l'ultima carezza...
È volta prestu in fiume !

Salute o Carò !

Stella

È SEREMU

À l'incantu d'una notte
D'una pace, d'una risa
Vecu stu visu zitellinu
Chì empie d'amore lu mio esse
E' sò...

Sò d'acqua linda è pura
Di ste muntagne materne
Ch'eo tengu quant'eo ti tengu
È chì tù tocchi si tù mi basgi
È si...

Si di l'avvene ch'eo feraghju
À u frisgiu d'una penna
Chì ci scriverà dumane à u plurale
Cum'è vita si scrive in dui
È seremu.

SCRIVE PÈ TÈ

Scrive pè iss'ochji ch'eo aghju c
À u lume d'un raghju di sole,
Chì l'impia di maraviglie.

Scrive pè st'abbracci d'amicizia
In dumanda d'un cunfortu
À l'asgiu di u carminu di l'amor

Scrive pè ciò chì hè diventatu,
È pè lu tempu à vene
Chì noi ci sparteremu in paru.

Cristo

CUTRURA

O la cutrura ch'aghju fattu
Era una leccia d'argentu
Rimurosa di fretu
Sopr'à un lavu sanguiniccia
U mondu si n'andava
Oghje hè cecu u mondu
È u chjassu s'infocia

A to risa hè spenta
A to pace mi manca
A to spalla mi manca
È a strada si sbacca
À l'arice di u tempu

Qual'hè chì ride nant' à a r
Quante stelle ghjalate
È a Sfinge chì ride
Quante Sfinge chì ridenu !

SPOSA

Un passu d'elefante chì s'av
Pianu, pianu, si sente.

À l'animale azzingata, una c
Per quelle strade, stenta.

Una prumessa, vestuta da sp
Seguita, eternamente.

U so mazzulu biancu, lacrim
Stringhje in pettu, indernu.

A campagna hè spachja, a t
In l'immensità, sò soli.

Un ghjornu ci ghjunghjeran
È u tempu serà fola.

Nant' à a tomba i fiori pieng
Un voceru, à l'eternu.

Tandu per issi lochi si ritruv
È si spengherà l'infernu.